

Duas novas commembras en il cussegl da la Banca chantunala grischuna

La Regenza ha elegì Barbara Heller e prof. dr. Michèle F. Sutter-Rüdisser da nov en il cussegl da la Banca chantunala grischuna. Ultra da quai ha ella nominà il cusseglier da banca vertent dr. Christoph Caviezel sco vicepresidente da la banca.

Tenor la Lescha davart la Banca chantunala grischuna (BCG) è la Regenza cumpetenta per eleger il cussegl da banca che sa cumpona da set persunas. Ils 31 da mars 2021 terminescha la perioda d'uffizi dal vicepresidente da la banca Christian Thöny che ha alura cuntanschì il temp d'uffizi maximal da 12 onns e che vegn a bandunar il cussegl da banca. Ultra da quai datti dapi in mez onn ina vacanza en il cussegl da banca. Pia ha la Regenza stuì occupar il vicepresidi da la banca ed eleger dus commembers novs dal cussegl da banca.

La funcziun dal vicepresidente da la banca surpiglia da nov il cusseglier da banca en uffizi dr. Christoph Caviezel per il rest da sia perioda d'uffizi fin ils 31 da mars 2023. Il giurist ed expert d'immobiglias viva a Laax ed è dapi 6 onns commember dal cussegl da banca.

Las novas en il cussegl da banca

Da nov ha la Regenza elegì Barbara Heller e prof. dr. Michèle F. Sutter-Rüdisser en il cussegl da banca. Michèle F. Sutter-Rüdisser ha 41 onns ed ha studegià scienzas economicas. Dapi l'onn 2018 è ella professuressa titulara a l'Universitad da Son Gagl. Ella ha enconuschientschas fundadas en il sector da prestaziuns da servetschs finanziais ed experientschas pli profundas dals fatgs da controlling e da contabilitad. Ella occupa differents mandants en gremis directivs ed en gremis d'experts. Dunna Sutter-Rüdisser è creschida si ad Arosa e viva oz a Turitg. Ella cumenza ses uffizi il 1. da schaner 2021.

Barbara Heller ha 53 onns ed ha studegià scienzas economicas e politicas. Ella ha lavurà en la branscha da finanzas e da farma en posiziuns directivas durant circa dus decennis. Oz maina ella sia atgna interpresa che porscha servetschs en il sector da la corporate governance. Ella ha enconuschientschas fundadas da la branscha da finanzas ed experientschas pli profundas en la gestiun ed en la cussegliaziun d'interpresas. Barbara Heller è titulara da differents mandats en gremis directivs ed en gremis d'experts. Ella viva a San Murezzan. Ella cumenza ses uffizi il 1. d'avrigl 2021.

Il cussegl da la Banca chantunala grischuna da set persunas vegn puspè ad esser cumplet il 1. d'avrigl 2021 e sa cumpona da trais dunnas e da quatter umens. Las elecziuns en il cussegl da banca han lieu resguardond las prescripziuns da l'Autoritad federala per la surveglianza dals martgads da finanzas (FINMA) ed il profil d'exigenzas da la Regenza per il cussegl da banca.

Infurmaziuns:

- president da la Regenza dr. Christian Rathgeb, schef dal Departament da finanzas e vischnancas, tel. +41 81 257 32 01, e-mail Christian.Rathgeb@dfg.gr.ch
- Thomas Müller, Banca Chantunala Grischuna, tel. +41 81 256 83 11, e-mail thom.mueller@gkb.ch

Gremi: Regenza

Funtauna: rg Chanzlia chantunala

Data: 24-11-2020

La Banca Chantunala Grischuna sin:

gkb.ch/medien | [Twitter](#) | [Facebook](#) | [Instagram](#) | [LinkedIn](#) | [Xing](#) | [YouTube](#) | [Flickr](#)

La Banca Chantunala Grischuna – il leader en il Grischun

La Banca Chantunala Grischuna porscha tut quai ch'i dovra per ina banca universala moderna – per persunas privatas, l'economia ed il maun public. La banca occupa 1015 collavuraturas e collavuratur (stadi dals 30-06-2020). En il chantun Grischun cun sias numerusas vals e pliras linguas, è l'interpresa represchentada cun 49 agenturas, la sedia principala sa chatta a Cuira. La Banca Chantunala Grischuna è participada a la Banca Privata Bellerive AG a Turitg ed a la Albin Kistler AG medemamain a Turitg. En il rendaquint semestril preschenta ella cun ina summa da bilantscha da CHF 30.9 milliardas in gudogn dal concern da CHF 95.2 milliuns. Il scrit da participaziun BCG è quotà a la bursa dapi ils 10 da settember 1985.

Termins

Quint annual 2020:	4 da favrer 2021
Rendaquint semestril 2021:	29 da fanadur 2021
